

四庫全書

子部

欽定四庫全書

子部  
清異錄卷上

詳校官中書

臣朱文翰

檢討臣何思鈞覆勘

總校官進士

臣楊懋珩

校對官編修

臣閔懋大

謄錄監生

臣宋維翰

欽定四庫全書

子部十二

清異錄

小說家類三 瑣記之屬

提要

臣等謹案清異錄二卷宋陶穀撰穀字秀實邠州新平人本唐彥謙之孫後避晉諱改陶氏仕晉為知制誥倉部郎中仕漢為給事中仕周為兵部侍郎翰林承旨入宋仍原官加戶部尚書事迹具宋史本傳是書皆採

撫唐及五代新穎之語分三十七門各為標題而注事實緣起於其下陳振孫書錄解題以為不類宋初人語胡應麟筆叢嘗辨之今案穀雖入宋實五代舊人當時文格不過如是應麟所云良是惟穀本北人僅一使南唐而花九品九命一條云張翊者世本長安因亂南來先主擢置上列乃似江南人語是則稍不可解耳豈亦雜錄舊文刪除未盡耶所記

諸事如出一手大抵即穀所造亦雲仙散錄  
之流而猶不偽造書名故後人頗引為詞藻  
之用樓鑰攻媿集有白醉軒詩據其自序亦  
引此書則宋代名流即已用為故實相沿既  
久遂亦不可廢焉乾隆四十三年五月恭校  
上

總纂官

臣紀昀

陸錫熊

臣孫士毅

總校官

臣陸

費

墀



欽定四庫全書

子部十二

清異錄總目

小說家類三  
瑣記之屬

卷上

天文門 十七事

地理門 十四事

君道門 十二事

官志門 十六事

人事門 十五事

女行門 凡五事

君子門 凡十事

么麼門 凡四事

釋族門 二十一事

僊宗門 凡六事

草木門 十五事

竹木門 十九事

百花門 二十六事



百菓門 三十八事

蔬菜門 二十五事

藥品門 二十事

禽名門 三十二事

獸名門 二十事

百蟲門 凡六事

魚門 凡三十三事

卷下

肢體門 凡八事

作用門 凡八事

居室門 二十四事

衣服門 二十五事

裝飾門 凡七事

陳設門 十四事

器具門 五十四事

文用門 二十六事

武器門 十一事

酒漿門 十六事

茗薺門 三十五事

饌羞門 三十九事

薰燎門 三十四事

喪塋門 凡九事

鬼門 一事

神門 二事

妖門一事

欽定四庫全書

清興錄卷上

宋陶穀撰

天文

龍潤

李煜在國時自作祈雨文曰尚垂龍潤之祥

跋扈將軍

隋煬帝泛舟忽陰風頗驟歎曰此風可謂跋扈將軍

奇水

雨無雲而降非龍而作號為奇水

天公絮

雲者山川之氣今秦隴村民稱為天公絮

赤真人

周季年東漢國大雪盛唱曰生怕赤真人都來一夜

春後大宋受命

吼天氏

呂園貧秋深大風隣人朱錄事富而輕園後疊小紙  
擲園前云呂園洛師人也身寒而德備一日吼天氏  
作孽獨示威於園

聖琉璃

王衍伶官家樂侍燕小池水澄天見家樂應制云一  
段聖琉璃

艷陽根

偽閩中書吏韋添天字謎云露頭更一日真是艷陽

根

碧翁翁

晉出帝不善詩時為俳諧語詠天詩曰高平上監碧

翁翁

地蓋

王彪天賦云溥為地蓋浩作星衢

潤骨丹

開元時高太素隱商山起六逍遙館晴夏晚雲中秋



午月冬日方出春雪未融暑簟清風夜階急雨各製  
一銘晚雲云作萬變圖先生一笑冬日云金鑪騰空  
映簷白醉春雪云消除疫癘名潤骨丹清風云醒骨  
真人六月惠然

冷飛白

老伶官黃世明常言逮事莊宗大雪內宴敬新磨進  
詞號冷飛白

天公玉戲

比丘清傳與一客同入湖南客曰凡雪仙人亦重之  
號天公玉戲

花鞦扇

俗以開花風為花鞦扇潤花雨為花沐浴至花老風  
雨斷送蓋花刑耳

驚世先生

驚世先生雷之聲也千里鏡電之形也

千里燭

道士王致一曰我平生不曾使一文油錢在家則為  
扇子燈出路則為千里燭意其日月也

迷空步障

世宗時水部郎韓彥卿使高麗卿有一書曰博學記  
偷抄之得三百餘事今抄天部七事迷空步障霧威

屑霜教水露冰子電氣母紅屑金星秋明大老天河

地理

黃金母

汾晉村野間語曰欲作千箱主問取黃金母意謂多稼厚畜由耕耘所致

空青府

契丹東丹王突欲買巧石數峰目為空青府

圓光石

趙光逢奴往淮壩偶得一石四邊玲瓏類火光逢愛之名曰圓光石

隱士泥

秣陵孟娘山土正白色曰白塏土周護始調塗其四  
堵因呼隱士泥

寵僊

桑維翰壽辰韋潛德獻太湖石一塊上有鐫字金飾  
曰寵僊

琉璃變

劉東叔賦陂月雨云且雨且凍山徑滑是誰作此琉  
璃變

四時節

桂林一日之間具四時之氣遷謫者惡之號為四時節

節木汴州

廣陵東南一都會凡百頗類京師號節木汴州

地上天宮

輕清秀麗東南為甲富兼華夷餘杭又為甲百事繁庶地上天宮也

青銅海

汴老圃紀生一鉏芘三十口病篤呼子孫戒曰此二十畝地便是青銅海也

七絃水

武夷山有石如立壁巔隱一泉分七派山僧顛堅名為七絃水

小蓬萊

遼命侯苑中鑿地廣一頃池心疊石象三神山號小

蓬萊

麥家地理

臘雪熟麥春雪殺麥田翁以此占豐儉為麥家地理

十辛

積麥以十辛良下子不得過三辛收發不得過三辛

上場入倉亦用辛日

君道

蕭閒大夫



劉錡偕立奢麗自恣在宮中自稱蕭閒大夫

候憲監

南漢劉晟殿側置宮人望明憲以候曉宮人謂之候  
憲監

仁爐義翰道薪德火

周杜良作唐太宗畫像贊云仁爐義翰道薪德火

摘瓜手

人君號能用才者莫如唐太宗然瀛洲十八人許敬

宗乃得與如摘瓜手耳取之既多其中不容無濫

掃國真人

隋裴寂待選京都一日郊飲遇老人畫地上沙土曰  
掃國真人又曰玉環天子又曰兵丹上聖告寂云三  
百年中最雄者此三人耳寂醉臥及醒已失老人矣  
後人紬繹其名掃國者太宗之剗平僭暴也玉環太  
真妃子字玄宗以妃而召亂玉環天子是玄宗明矣  
憲宗始以兵定方鎮之強終以丹蹂滅身兵丹之目

其憲宗之謂乎

避賢招難存三奉五皇帝

昭宗丁不可為之時遭無所立之地人戲上尊號曰  
避賢招難存三奉五皇帝蓋帝常曰朕東西所至禍  
難隨之願避賢者路三謂三主帝后及楊柳昭儀五  
謂全忠行瑜克用茂貞韓建

彩局兒

開元中後宮繁衆侍御寢者難於取舍為彩局兒以

定之集宮嬪用骰子擲最勝一人乃得專夜官瑞私  
號骰子為對角媒人

大昏元年

王曦紹僭號梁閩越淫刑不道黃峻曰合非永隆恐  
是大昏元年

孟蜀弔伐

孟蜀隳危大軍弔伐偽祖遣皇太子玄詰平章事王  
昭遠統兵捍禦玄詰乳臭子昭遠僕廁材太祖歎曰

孟昶都無股肱爪牙其亡不晚矣

紫明供奉

武帝宣內供奉賜坐食甘露醪蜜搗山藥油浴既退

侵夜宮嬪離次上獨映琉璃燈籠觀書久之歸寢殿

王才人問官家今日以何消遣上曰綠羅供奉已去

皂羅供奉

宮人持髻

不來與紫明供奉

燈

相守熟讀尚書

無逸篇數遍朕非不能取熱鬧快活正要與絃管尊

罌暫時隔破

容易郎君

晉少主志於富貴纔進姓名即問幾錢拜官賜職出於談笑幸臣私號容易郎君

大體雙

劉錕昏縱角出得波斯女年破瓜黑脂而慧艷善淫曲盡其妙錕嬖之賜號媚猪延方士求健陽法久乃得多多益辦好觀人交選惡少年配以離宮人皆妖俊美健者就後園褫衣使露而偶錕扶媚猪延行覽

玩號曰大體雙又擇新採異與媚猪對鳥獸見之熟  
亦作合

官志

風力相國

越公楊素專恣既久包藏可畏四方寒心不敢直指  
故以風力相國槩之

力一作刀

潤家錢

南漢地狹力弱事例卑猥州縣時會僚屬不設席而

分饋阿堵號潤家錢

分身將

梁將葛從周忠義驍勇每臨陣東西南北忽焉如神

晉人稱為分身將

肉雷

來紹乃唐酷吏俊臣之裔天稟驚忍以決罰為樂嘗  
牢卻陽生靈困於孽手創造鐵繩千條或有令不承  
則急縛之仍以其半搥手往往委頓每肆枯木之威



則百囚俱斷車轆響震動一邑時呼肉雷

百和叅軍

袁象先判衢州時幕客謝平子癖於焚香至忘形廢  
事同僚蘓收戲刺一札伺其亡也而投之云鼎炷郎  
守馥州百和叅軍謝子平

擷金煉玉束雪量珠

王播拜諸道鹽鉄轉運使祕書丞許少連賀啟擷金  
煉玉束雪量珠

玉葺金鹵

偽唐徐履掌建陽茶局弟復治海陵鹽政監檢烹煉之亭榜曰金鹵履聞之潔敬焙舍命曰玉葺

赤心榜

張聿宰華亭治政凜然凡有府使賦外之需直榜邑門民感其誠指為赤心榜

小宰羊

時戢為青陽丞潔已勤民肉味不給日市豆腐數箇

邑人呼豆腐為小宰羊

抱冰公事

蒙州立山縣丞晁覺民自中原避兵南來因仕霸朝  
食料衣服皆市於隣邑一吏專主之既回物多毫末  
皆寘諸獄當其役者曰又管抱冰公事也

牛皮綳鐵鼓

蘓州錄事叅軍薛朋龜廉勤明察胥吏呼為牛皮綳  
鉄鼓言難縵也

軟繡天街

本朝以親王尹開封謂之判南衙羽儀散從燦如圖  
畫京師人歎曰好一條軟繡天街近日士大夫騎吏  
華繁者亦號半里嬌

人間第一黃

偽唐賊臣褚仁規竊祿泰州刺史惡政不可縷舉有  
智民請吻儒為二詩皆隱語凡寫數千幅詣金陵粘  
貼事乃上聞詩曰多求囊白昧蒼蒼兼取人間第一

黃云云白黃隱金銀字

脯掾

何敬洙帥武昌時司倉彭湘傑習知膳味就中脯腊  
尤殊敬洙檄掌公厨郡中號為脯掾

裹頭冰

宋城主簿祝天貺勵已如冰玉百姓呼為裹頭冰天  
貺去後和甄來尉頗得天貺餘味加以儒而文民間  
語曰去了裹頭冰却得一段著脚琉璃

名字副車

鄧州別駕令狐上選政貪性疎百姓呼名字副車

人事

開侯

侯元亮馬氏時湖湘宰退居長沙門常有客宴會無

虛日人目為開侯

九龍燭

杜黃裳當憲宗初載深謀密議眷禮敦優生日例外

別賜九龍燭十挺

呬大夫

家述常聿修仕偽蜀為太子左贊善大夫西人皆滑  
稽聿修伺述酒斃將竭叩門求飲未通大道已見壘  
恥濡筆書壁曰酒客乾喉去唯存呬大夫

九福

天下有九福京師錢福眼福病福屏帷福吳越口福  
洛陽花福蜀川藥福秦隴鞍馬福燕趙衣裳福

逢窠巷陌

四方指南海為烟月作坊以言風俗尚淫今京師鬻色戶將及萬計至於男子舉體自貨進退恬然遂成逢窠巷陌又不止烟月作坊也

手民

木匠總號運金之藝又曰手民手貨

鼎社

廣順三年以柴守禮子榮為皇子拜守禮太子少保



致仕皇子即位是為世宗守禮居西洛與王溥王彥超韓令坤之父結友嬉游裘馬衣冠偕逼逾制當時人為一日具設樂集妓輪環無已謂之鼎社洛下多妙妓守禮日點十名以片紙書姓字押字大如掌使人持呼之被遣者詣府尹出帝呈示尹從旁僉字妓見紙畫時爭到買喚子號曰鼎社

到頭菴主徹底門生

魏仁浦長百僚提獎單隱巖至列郎又附他相仁浦

不悅一日浮屠仁普來乞山資留飯而隱巖至以束素贈別顧仁普曰到頭菴主徹底門生今昔所難即而勉之隱巖面不類人唯唯而退

女及第

齊魯燕趙之種蠶收繭訖主蠶者簪通花銀碗謝祠廟村野指為女及第

錢井經商

僦屋出錢號曰癡錢故僦賃取直者京師人指為錢

井經商

不動尊

宣武劉錢民也鑄鐵為筭子薄游妓求釵奩劉子辭  
之姥曰郎君家庫裏許多青銅教做不動尊可惜爛  
了風流拋散能使幾何劉子云我爺喚筭子作長生  
鐵況錢乎彼日日燒香禱祝天地三光要錢生兒絹  
生孫金銀千百億化身豈止不動尊而已為人父者  
聞此可以少戒

甌宰

廣席多賓必差一人慣習精俊者充甌宰使舉職律衆

金搭膝

溫韜少無賴拳人幾死市魁將送官謝過魁前拜逾數百魁釋之韜每念之以為恥既貴達拍金薄為搭膝帶之曰聊酬此膝

鄭世尊

或曰不肖子傾產破業所病不瘳其終奈何司馬安  
仁曰為鄭世尊而已又問何謂曰鄭子以李娃故行  
乞安邑幾為餒鬼佛世尊欲與一切衆生結勝因緣  
遂於舍衛次第而乞合二義以名之非不肖子尚誰  
當乎

三債三悅

桑維翰草萊時語友人吾有富貴在造物未還三債  
是以知之上債錢貸中債妓女下債書籍既而鉄硯

功成一日酒後謂親密曰吾始望不及此當以數語  
勸子一杯其人滿酌而引公云吾有三悅而持之一  
曰錢二曰妓三曰不敢遺天下書公徐云吾銜露太  
甚自罰一觥

女行

胭脂虎

朱氏女沉慘狡妬嫁為陸慎言妻慎言宰尉氏政不  
在已吏民語曰胭脂虎

冠子蟲

俗罵婦人為冠子蟲謂性若蟲蛇有傷無補

補闕燈檠

異時儒李大壯畏服小君萬一不遵號令則叱令正坐為綰匾髻中安燈盞燃燈火大壯屏氣定體如枯木土偶人譚目之曰補闕燈檠

黑心符

一妻不能御一家從可知以之卿諸侯一國從可知

以之相天子天下從可知蓋夫夫婦婦而天下正正  
家而天下定矣惟女子小人為難養近之則不遜遠  
之則怨論語之教也牝雞之晨惟家之索書之訓也  
无攸遂在中饋易之戒也能循法度則可以承先祖  
共祭祀詩之勸也威公縱文姜喪軀而幾亡魯高祖  
畏呂氏召亂而幾亡漢文帝牽掣於獨孤廢嫡長立  
致大業之傾高宗溺惑於武媚故失威權階大周之  
僭萬乘尚爾况庶人乎又况講再醮備繼室既無結



髮之情常有扶筐之志安得福祥免禍幸矣閨家以  
蘆絮示薄許氏以鉄杵表酷其事歷歷可見為夫者  
眈少姿入巧言房簣之間夜以繼日纏愛紐情牢不  
可拔妻計日行夫勢日削如鉗礙口噤不得聲如絡  
冒頭癡不得動如杻械被身束縛囚繫不得自由而  
至寒熱饑飽在彼不在我出入起居在彼不在我使  
為不信惟命使為不義惟命使為不忠惟命使為不  
慈惟命使躬行殘忍刻薄之所不為惟命呼令殺人

則恨頭落之遲呼令自殺則恐刀來之晚極口罵辱  
馬迎以笑嬉盡力決捷馬連稱罪過數以犯再拜謝  
之後以事健步辦之曰舐吾痔諾而趨曰嘗吾便跪  
而進上不知有親知有吾妻而已下不省有幼省有  
吾妻而已人方以謂古不聞今不見彼尚且流汗積  
踵吐血逾胸悚懼懍懍戰栗振掉惟恐妻語之厲而  
色之莊也其效伊何有家則妻擅其家有國則妻據  
其國有天下則妻指麾其天下今一縣則小君映簾

守一州則夫人並坐論道經邦奮庸熙載則于飛對  
內殿連理入都堂粉黛判賞罰裙襦執生殺矣世雖  
晚猶有是非俗雖澆猶分善惡有臣如此君必亂之  
有朋如此朋必絕之有閭里如此隣必去之有民如  
此官必刑之有子如此父母必號泣而擯之有同氣  
如此兄弟必紛紜而捨之有父如此有祖如此有伯  
叔如此子孫侄如此必色變心移東西南北而避之  
婦人遂啟口為雲霧發喉為雷霆展身為電轉身為

風誣春為秋改白為黑指吳作越號女作男無力齟  
齬喜不自勝喜在其間愚以度日坐以待盡或十年  
或六七年或二三年齒髮且衰壽命且盡貨均彼卷  
而懷之則聯秦合晉之事萌而請媒通聘之迹見矣  
昏丈夫君已不用友已不齒鄉已不錄兄弟不親子  
孫不集人非高於泰山鬼責深於滄海其家墟矣老  
方悲其墓臭矣死尤辱妻而繼焉有格言也就夫言  
之乃並枕於菟連盤野葛就子孫言之乃通心鑽徹

骨錐就朋友親族言之乃一輪車四牆屋甚者至於  
殺夫首子禍綿刀鋸寃著市曹祭祀絕而門庭蕪然  
世人恬為之悟且畏者曾無也吾年六十目見耳聞  
不可筭數今訓汝等有妻固所不免當待之如賓客  
防之如盜賊以德易色修己率下妻既正子孫敢不  
正乎萬一不幸中道鼓盆巾櫛付之侍婢米鹽畀之  
諸子曰授方畧坐享宴安又或無嗣孤單則宜歸老  
弟姪以心與之孰敢不盡若更重昏續娶定見敗身

殞家至時親友不欲言子孫不敢諫兼已惑已悞難  
信難處豈知吾熟諳而預言之龜鑑在前無復縷縷  
立石中寢永戒來裔稍越吾言祖先神明共賜誅殛  
百世循之真萬金之良藥也 右萊州長史于義方  
黑心符一卷錄以傳後黑心者繼婦之德名也陶氏  
子孫其戒之哉

水香勸盞

扈戴畏內特甚未仕時欲出則謁假於細君細君滴

水於地指曰不乾須前歸若去遠則燃香印搗至某  
所以為還家之驗因筵聚方三行酒戴色欲逃遁朋  
友默曉譁曰扈君恐砌水隱形香印過界耳是當罰  
也吾徒人撰新句一聯勸請酒一盞衆以為善乃俱  
起一人捧甌吟曰解稟香三令能遵水五申逼戴飲  
盡別云細彈防事水短藝戒時香別云戰兢思水約  
匍匐赴香期別云出佩香三尺歸防水九章別云命  
繫逡巡水時牽決定香戴連沃六七巨觥吐嘔淋漓

既上馬羣譟曰若夫人恠遲但道被水香勸盍留住

君子

髯佛

滑州賈寧性仁恕賑饑救患者稚愛慕之以寧多髯  
遂皆以髯佛呼之

老鴉陳

巴陵陳氏累世孝謹鄉里以老鴉陳目之謂烏鴉能  
反哺也



返生錢

宣城儒士林脩已深方脉治病不求報謝人致饋再  
三哀懇則留百餘一時人名為返生錢

泰火否爐

蒲中趙節博瞻剛直鄉人敬之嘗作爐火詩云近冬  
附火為泰火透春擁爐成否爐用否隨時有輕重進  
身君子合知無

天梳日帽

唐隱君子田游巖一日冬晴就湯泉沐髮風於朝暉之下適所親者至曰高年豈不自愛而草草若是耶游巖笑而答曰天梳日帽他復何需

安富大夫

岐下梁撝以市隱為樂有府從事來見將為言於岐帥而官之撝怒府從事徐曰先生之量未易量也人之貧者富之人之病者安之人之賤者貴之人視先生賤且病之窮叟耳而皆反其所樂而今而後敢以

安富大夫目先生

棣友

范陽竇禹鈞生五子子儀等友愛天至儀曰吾與汝等離兄弟之拘牽真棣友也

百悔經

閩士劉乙嘗乘醉與人爭妓女既醒慚悔集書籍凡因飲酒致失賈禍者編以自警題曰百悔經自後不飲至於終身

樂天羹七百二十碗

周維簡隱洪州西山嘗云得米三四石樂天羹七百二十碗足了一年支費

虛釘玲瓏石鎮羊

游士藻為晉王記室予過其居知昨夜命客問食品曰第一虛裝玲瓏石鎮羊予曰好改作釘字便是一句詩士藻令取夜來食目對面塗注云吾平生以順人情為佛事獨違學士可乎

么麼

蟲使

莊宗時伶官朱國賓天姿乖狠衆皆畏恨以其閩人號為蟲使

腹兵

荆楚賈者與閩商爭宿郎荆賈曰爾一等人橫面蛙言通身劍戟天生玉網腹內包蟲閩商應之曰汝輩腹兵亦自不淺蓋謂荆字從刀也

鑿空大使駕險三郎

桂州衙內都知兵馬使蔣剛善迎合上官剝兵剋民  
誑妄詐欺運以智數剛序行第三時號鑿空大使駕

險三郎

笺精

螺川人何畫薄有文藝而屈意於五侯鯖尤善酒人  
以笺精誚之

釋族

的乳三神仙

太祖陳橋時太后方飯僧於寺懼不測寺主僧誓以  
身蔽上受禪賜的乳三神仙

引飯大師

禪家未粥飯先鳴槌維那掌之藪林目淨槌為引飯  
大師維那為樂槌都督

鉢盂精

行脚僧驚舉子驢舉子不忿僧曰麻衣鬼著汝何時

會林舉子揚鞭曰鉢盂精且理會取養命圓

掃地和尚

王建偕立後有一僧常持大帚不論官府人家寺觀  
遇即汎掃人以掃地和尚目之建末年於諸處寫六  
字云水行仙怕秦川後王衍秦川之禍方悟水行仙  
即衍字耳

雙撚布

長安素上人四時止雙撚布為三衣執一鬼脚杖而



已

寄生囊

梓潼雙燈寺僧書一頌曰撞來好箇寄生囊云云跌坐而化

寒灰道者

俞郢隱天童山大寒則於厨內取麩火一器亦納直於主者呼寒灰道者全利頭僧舉能素苦白禿瘡  
痴糊頂禪人皆呼為寒灰道者

泥融覺

比丘無染游廬山春雨路滑忽仆石上由是洞見本  
原士大夫稱為泥融覺

研金虛縷沉水香紐列環

晉天福三年賜僧法城跋遮那

袈裟環也

王言云勅法城

卿佛國棟梁僧壇領袖今遣內官賜卿研金虛縷沉  
水香紐列環一枚至可領取

無無老

沙門愛英住池陽村示人之語曰萬論千經不如無  
念無營時郡娼滿瑩娘多姿而富情真妓女中麟鳳  
進士張振祖以無念無營有情有色製一聯云門前  
艸滿無無老床底錢多有有娘

猪羊三昧

冤胸僧行修食必大炙人戲之云修院主猪羊雞鴨  
三昧正受

紫織方

獲嘉禿士貫微僭奢如貴要子弟旋織小疊勝羅染  
堪服號紫織方

麩忠

蒸雪會乃道忠行化餘杭一錢不遺專供靈隱海衆  
月設一齋延僧廣備蒸作人人喜曰來日赴忠道者  
蒸雪會忠之化人惟曰買麩故稱麩忠

舟航化

玄奘論道釋云道有為宗舟航化佛無為宗虛空化

湯餅藏油蠶飽喫佛

無念苦行比丘也食量延數人楚大韶延僧既旅集  
大韶長子以長紙書湯餅藏油蠶飽喫佛榜念坐處  
念不動聲色如法飲食而退

梵嫂

相國寺星辰院比丘澄暉以艷倡為妻每醉點胸曰  
二四阿羅烟粉釋迦又沒頭髮浪子有房室如來快  
活風流光前絕後忽一少年踵門謁暉願置酒叅會

梵嫂暉難之凌晨但見院牌用紙漫書曰勅賜雙飛之寺

偃紅倚翠大師

李煜在國微行娼家遇一僧張席煜遂為不速之客  
僧酒令謳吟吹彈莫不高了見煜明俊醞藉契合相  
愛重煜乘醉大書右壁曰淺斟低唱偃紅倚翠大師  
鴛鴦寺主傳持風流教法久之僧擁妓入屏帷煜徐  
步而出僧妓竟不知煜為誰也煜嘗密諭徐鉉鉉言

於所親焉

僧旂佛傘

龍興寺檀越捨幡盖文云僧旂交舞丁當起於風鈴  
佛傘高擎焜耀生乎日鑑其造語脫落尋常軌轍而  
不書誰人製撰

三隻鞵

去習者雲行至峨眉山而隱蓄三隻鞵常穿二補一  
歲久裂帛交雜望之茸茸焉自呼為獅子鞵

五百斤鐵蒸胡

汴州封禪寺有鐵香爐大容三石都人目之曰香井  
爐邊鎖一木櫃竅其頂游者香畢以白水真人投櫃  
竅寺門收此以為一歲麥本他院釋戲封禪房袍曰  
貴刹不愁齋粥世尊面前者五百斤鉄蒸胡好一件  
堅牢常住

肉香爐肉燈臺

齊趙人好以身為供養且謂兩臂為肉燈臺頂心為



肉香爐

僊宗

饕餮僊

近世事僊道者不務寡欲多搜黃白術貪婪無厭宜  
謂之饕餮僊

花餅道人

五朝泉州有貧士行乞得錢盡買花麻餅食之羣小  
兒呼為花餅道人

長生錄

華陰士人子別莊在老鵝谷因收刈與密友飲夜醉  
乘月出莊信步似十餘里至一宮殿中皆僊妝婦人  
玉宇寶臺上安玉匣大標金字曰長生錄二人覩一  
金翠雙鬟女發書讀之曰九琳上魔伯校玉書先春  
法師長養三天花木並增筭五千年二人失聲忽然  
不見身在亂石喬木間耳

太飛丸

吳毅臨邛人以多疾齋禱於青城山紫極院置壇設  
醮科儀畢假寐齋廳夢天人稱自剪刀館來授一竹  
簡題曰太飛丸鍊心法用鹽解僊人一物注曰世間  
白蝙蝠是其製合之節甚詳仍戒以絕嗜慾方可服  
氤氲大使

朱起家居陽翟年踰弱冠姿韻爽逸伯氏虞部有女  
妓寵寵艷秀明慧起甚留意寵尤繫心緣館院各別  
種種礙隔起一志不移精神恍惚有密友詣都輦起

送至郊外獨回之次逢青巾短袍擔筇杖藥籃者熟  
視起曰郎君幸值貧道否則危矣起駭異下馬揖之  
青巾曰君有急直言吾能濟起再拜以寵事訴青巾  
笑曰世人陰陽之契有繾綣司總統其長官號氤氲  
大使諸夙緣冥數當合者須鴛鴦牒下乃成雖伉儷  
之正婢妾之微買笑之畧偷期之秘僊凡交會華戎  
配接率由一道焉我即為子囑之臨去籃中取一扇  
授起曰是坤靈扇子凡訪寵以扇自蔽人皆不見自

此七日外可合合十五年而絕起如戒往來無阻後  
十五年寵疫病而殂青巾蓋僊也

殮和閣

太上明堂玄宗上經清齋休糧存日月在口中趙威  
伯受法於范丘林行挹日月之道內景注載上清紫  
虛吞日月氣法蜀天師杜光庭所廬作殮和閣奉行  
如上事

草

香祖

蘭雖吐一花室中亦馥郁襲人彌旬不歇故江南人以蘭為香祖

昌九

宜春太守虞杲郡齋植昌蒲五檻次子夢髯翁自號昌九言願賜保養

瓔珞藤

終南山出瓔珞藤軟碧可愛葉甚小有子纍纍然纏

固其上真似瓔珞

科名草

杜荀鶴舍前椿樹生芝草明年及第以漆彩飾之安  
几硯間號科名草

蕉迷

南漢貴璫趙純節性惟喜芭蕉凡軒窗館宇咸種之  
時稱純節為蕉迷

草帝

青城山叟謝調芭蕉歌畧云草中一種無倫比瑣屑  
蒿萊望帝尊

扇子僊

南海城中蘓氏園幽勝第一廣主嘗與幸姬李蟾妃  
微至此憇酌綠蕉林廣主命筆大書蕉葉曰扇子仙  
蘓氏於廣主草宴之所起扇子亭

綠天

懷素居零陵菴東郊治芭蕉亘帶幾數萬取葉代紙



而書號其所曰綠天菴曰種紙廐後道州刺史追作  
綠天銘

馨列侯

唐保大二年國主幸飲香亭賞新蘭詔苑令取滬溪  
美土為馨列侯壅培之具

蕭寒郡假節侯

蘆之為物大類此君但霜雪侵陵改素為愧耳故好  
事君子號蘆為蕭寒郡假節侯

護階君子

常保衡呼麥門冬鹿葱為護階君子金盞玉簪為綠  
莊嚴

一元木公

瓦松穢屋為不材之草有門生離合為四字曰一元  
木公實不稱名瓦松蓋白日登天可以下視百草矣  
綠衣元寶

苔一名地錢一名綠衣元寶王彥章葺園亭壘壇種

花急欲苔蘚少助野意而經年不生顧弟子曰巨耐  
這綠扣兒

土三材

葛為世用花入藥根參果蓀筋備紉織土生而具三  
材亦草中之白眉

綠參差

芭蕉詩最難作胡邵陽嶠一篇云野人無帳幄愛此  
綠參差云云

木竹附

綠卿

王彪臨池賦云碧氏方澄宅龜魚而蕩漾綠卿高拂

宿烟霧以參差

節氏

三堂人家石柱礎有文曰虛中子生成記初云虛中  
子姓節氏化龍之後也隔十數字云與笙簫令壽鬣  
支離叟堅丈同志莫逆又其後云生子茁封甘銳侯

餘皆漫滅不存疑是昔人種竹記

竊記鬣是松支  
是柏茁是筍

### 圓通居士

比丘海光住廬山石虎菴夜夢人長清瘦而斑衣言  
捨身為菴中供養具俄窗外竹生一筍花紫籜如夢  
者之衣既成竹六尺餘無節黃綠瑩淨江州太守聞  
之意將奪取竹一夕自倒太守尋罪去光乃用為拄  
杖目曰直兄光來都下予因見之光云夢者自稱圓  
通居士予遂小篆此四字於杖之首令黑漆之

丁香竹

荆南判官劉或棄官游秦隴閩粵篋中收大竹拾餘  
顆每有客則斫取少許煎飲其辛香如雞舌湯人堅  
叩其名曰謂之丁香竹非中國所產也

平頭筍

海南島中一類筍極腴厚而甚短島人號平頭筍

天親竹

秦維言雙竹自是一種有成林者因出三拄杖兩歧

後問浙人云此是天親竹有時出一番雙筍故例皆  
分歧亦非年年有之

不平生

崔鳳蹉跎失志洛南天慶觀頗幽雅常陪友生夏月  
招涼於古槐下戲曰予不登九品此槐不得為手版  
想亦助不平也是後朋從呼槐為不平生

錦心氏繡腹郎

懿宗時求老槐於城北筆頭谷李殊莊亦不下百年

矣樹腰刻小字一曰錦心氏一曰綉腹郎云殊之祖  
愛甚故刻記之

淺色沉

同光中秦隴野人得柏樹解截為版成器物置密室  
中時馨芳之氣稍類沉水初得而焚之亦不香蓋性  
不宜火此淺色沉耳

木僊

張薦明隱樂山林有古松十餘株謂人曰予人中之



僊此木中之僊也

文章樹

張曲江里第之側有古柘嘗因狂風發其一根解為器具花紋甚奇人以公之手筆冠世目之曰文章樹

三義亭

同州邵陽縣劉靖家兄弟不異居宅旁榆樹生桑西廊梧桐生穀枝明年墳中白楊生檜並鬱茂相若鄉人號榆為義祖桐為小義白楊為義孫分先後也縣

令出官錢為修三義亭

漏春和尚

新栽柳樹必用泥固濟其木頗類比丘頂相元伯玉  
宅前插柳初春吐芽伯玉曰且得漏春和尚一一無  
恙蓋取杜子美漏泄春光有柳條之句

通天筍

衡州人家竹林中生五筍徹梢無節目觀者神之名

通天筍

蚱蜢竹

江湖間有一種野竹其葉糾結如蟲狀山民曰此蚱蜢竹也

鞞樹

金鄉路上一老榆往來者就樹下易草屨例以其舊懸而去行人指為鞞樹

省便珠

釋知足嘗曰吾身爐也吾心火也五戒十善香也安

用沉檀箋乳作夢中戲人強之但摘窗前柏子焚爇  
和口者指為省便珠

佛影疏

新羅論迦邏島有筍曰佛影疏中國雖大無此一種  
邊幼節

余為筍効傳休奕作墓誌曰邊幼節字脆中晉林琅  
玕之裔也以湯死建隆二年三月二十五日立石

花

小南強

南漢地狹力貧不自揣度有欺四方傲中國之志每見北人盛誇嶺海之強世宗遣使入嶺館接者遺茉莉文其名曰小南強及本朝銀主面縛偽臣到闕見洛陽牡丹大駭歎有搢紳謂曰此名大北勝

睡香

廬山瑞香花始緣一比丘晝寢磐石上夢中聞花香烈酷不可名既覺尋香求之因名睡香四方奇之謂

乃花中祥瑞遂以瑞易睡

獨立僊

孟昶時每臘日內官各獻羅體圈金花樹子梁守珍  
獻忘憂花縷金於花上曰獨立僊

錦洞天

李後主每春盛時梁棟窗壁柱拱階砌並作隔筒密  
挿雜花榜曰錦洞天

黃玉玦

錢俶以弟信鎮湖州後圃芙蓉枝上穿一黃玉玦枝梢交雜不知從何而穿也信截榦取玦以獻人謂真僊來遊留此以驚世耳

百葉僊人

洛陽大內臨芳殿莊宗所建牡丹千餘本其名品亦有在人口者具於後

百葉僊人

淺紅

月宮花

白

小黃嬌

深黃

雪夫人

白

粉奴香

白

蓬萊相公

紫花黃綠

卵心黃

御衣紅

紫龍盃

三雲紫

盤紫酥

淺紅

天王子

出樣黃

火焰奴

正紅

太平樓閣

十葉黃

玉雞苗

東平城南許司馬後圃薔薇花太繁欲分於別地栽  
插忽花根下掘得一石如雞狀五色燦然郡人遂呼  
薔薇為玉雞苗

樓羅歷



劉鋹在國春深令宮人鬪花凌晨開後苑各任採擇  
少頃勅還宮鎖苑門膳訖普集角勝負於殿中宦士  
抱闥宮人出入皆搜懷袖置樓羅厯以驗姓名法制  
甚嚴時號花禁負者獻耍金耍銀買燕

鼎文帳

許智老居長沙有木芙蓉二株庇可畝餘一日盛開  
賓客盈溢坐中王子懷言花不踰萬若過之受罰指  
所携妓賈三英胡錦鼎文帳以酬直智老命僕厠羣

採凡一萬三千餘朶子懷褫帔納主人覩而默遁

十二香

吳門于永錫專好梅花吟十二香詩今錄其名意

萬選香

拔枝剪折  
遠揀繁種

水玉香

清水玉缸  
參差如雪

二色香

帷帳深置  
脂粉同妍

自得香

簾幕窺蔽  
獨享馥然

撲凸香

巧挿鷗鬢  
妙麗無比

筭香

採折湊然  
計多受賞

富貴香

簪組共賞  
金玉輝映

混沌香

夜室映燈  
暗中拂鼻

盜跖香

就樹臨瓶  
至誠竊取

君子香

不假風力  
芳譽遠聞

一寸香

醉藏懷袖  
馨聞斷續

使者香

專使貢持  
臨門遠送

紫風流

廬山僧舍有麝囊花一叢色正紫類丁香號紫風流  
江南後主詔取數十根植於移風殿賜名蓬萊紫

婪尾春

胡嶠詩餅裛數枝婪尾春時人罔喻其意桑維翰曰  
唐末文人有謂芍藥為婪尾春者婪尾酒乃最後之  
盃芍藥殿春亦得是名

金剛不壞王

懿宗賞花短歌云長生白久視黃共拜金剛不壞王  
謂菊花也

雨天三昧

闍昶春餘宴後苑飛紅滿空昶曰彌陀經云雨天曼  
陀羅華此景近似今日觀化工之雨天三昧宜召六  
宮設三昧燕

花經九品九命

張翊者世本長安因亂南來先主擢置上列時邦西  
平昌令卒翊好學多思致嘗戲造花經以九品九命  
升降次第之時服其允當

一品九命

蘭

牡丹

蠟梅

酴醾

紫風流

睡香  
異名

二品八命

瓊花

蕙

巖桂

茉莉

含笑

三品七命

芍藥

蓮

薝蔔

丁香

碧桃

垂絲海棠

千葉

四品六命

菊

杏

辛夷

豆蔻

後庭

忘憂

櫻桃

林禽

梅

五品五命

楊花

月紅

梨花

千葉李

桃花

石榴

六品四命

聚八儂

金沙

寶相

紫薇

凌霄

海棠

七品三命

散水

真珠

粉團

郁李

薔薇

米囊

木瓜

山茶

迎春

玫瑰

金燈

木筆

金鳳

夜合

躑躅

金錢

錦帶

石蟬

八品二命

杜鵑

大清

滴露

刺桐

木蘭

雞冠

錦被堆

九品一命



芙蓉

牽牛

木槿

葵

胡葵

鼓子

石竹

金蓮

花九錫

警忘錄載羅虬撰花九錫然亦須蘭蕙梅蓮葦乃可  
披襟若夫容躑躅望仙山木野草直惟阿耳尚錫之  
云乎

重頂帷

障風

金錯刀

剪折

甘泉

浸

玉缸

貯

雕文臺座

安置

畫圖

翻曲

美醕賞

新詩詠

五宜

對花焚香有風味相和其妙不可言者木犀宜龍腦  
醑醕宜沈水蘭宜四絕含笑宜麝蓆蒿宜檀韓熙載  
有五宜說

瀛洲玉雨

司空圖菩薩蠻謂梨花為瀛洲玉雨

巖山圭木

韓荅叟離合巖桂二字為巖山圭木

慈恩傳粉綠衣郎

陶子召客於西宅為醑醺開尊無以侑勸請坐人各  
撰小名得有思致者七是日十一客費麴生八斗夜  
三鼓而罷家並有醑醺酒肉如吾十二人之樂沒世  
不可得賽白蔓君四字天花花聖人慈恩傳粉綠衣  
郎獨步春沈香密友

百宜枝杖

酴醾木香事事稱宜故賣插枝者云百宜枝杖此洛社故事也

花腊

脂粉流愛重酴醾盛開時置書冊中冬間取以插髻蓋花腊耳

香瓊綬帶

薛熊賞酴醾詩云香瓊綬帶雪纓絡

花太醫

蘓直善治花瘡者腴之病者安之時人競稱為花太醫

握舉牡丹法

常以九月取角屑硫黃礬如麪拌細土挑動花根壅  
罨入土一寸出土三寸地脉既煖立春漸有花蕾生  
如粟粒即掐去惟留中心一莖氣聚故花肥至開時  
大如盃面

蘭花第一香

蘭無偶稱為第一

洛白揚紅汴黃江紫

瑞香有洛白揚紅汴黃江紫花之變極矣

菓

瑞聖奴

天寶年內中柑樹結實帝日與貴妃賞御呼為瑞聖

奴

餘甘尉

鄴中環桃特異後唐莊宗曰昔人以橘為千頭木奴此不為餘甘尉乎

梅檀

馮長樂別墅有數種梅檀紫粉分心軟帶之類

冷金丹

來禽百枚用蠶蜜浸十日取出別入蠶蜜五斤細丹砂末二兩攪拌封泥一月出之陰乾名冷金丹飯後酒時食一兩枚其功勝九轉丹

省事三

北方蓮實狀長少味出藕頗佳然止三孔用漢語轉  
譯其名曰省事三

蜜父蠟兄

建業野人種梨者詫其味曰蜜父種枇杷者恃其色  
曰蠟兄

青灰蔗

甘蔗盛於吳中亦有精粗如崑崙蔗夾苗蔗青灰蔗



皆可煉糖枕椰蔗乃次品糖坊中人盜取未煎蔗液  
盈盃啜之功德漿即此物也

金香大丞相

莊宗小酌進新橘命諸伶咏之唐朝美詩先成曰金  
香大丞相兄弟八九人剥皮去滓子若箇是汝人帝  
大笑賜所御軟金盃

赤誌翁

予嘗以鴨卵及蓮枝一捻紅餉符昭遠介還送一詩

云聖胎初出赤誌翁醜杖旁扶赤誌翁

河東飯

晉王嘗窮追汴師糧運不繼蒸粟以食軍中遂呼粟

為河東飯

雞冠棗

睢陽多善棗雞冠棗宜作脯醢醢棗宜生啖或謂棗

是聖花兒

紅雲宴

嶺南荔枝固不逮閩蜀劉鋹每年設紅雲宴正紅荔  
枝熟時

玉枕蓀

嶺外多蓀間有發深山邃谷而得之者枚瑰連屬有  
數十斤者味極甘香人多自食未嘗貨於外本名玉  
枕蓀又號三家蓀

土麝香

嘗因會客食瓜言最惡麝香坐有張延祖曰是大不

然吾家以麝香種瓜為鄉里冠但人不知制伏之術耳求麝二錢許懷去後旬日以藥末攪麝見送每種瓜一窠根下用藥一捻既結破之麝氣撲鼻次年種其子名之曰土麝香然不用藥麝止微香耳

掌扇岡

櫻桃素盛睢陽地名掌扇岡尤繁妙有一樹收子至三石者

東韋李

東韋李朔方處處有云韋氏中東脊之孫種來得名  
天公掌

淇薯藥稱最大者號天公掌次者號拙骨羊

月一盤

蜀孟昶月旦必素食性喜薯藥左右因呼薯藥為月  
一盤

四十團

賈人自嶺外還得一枝龍眼已鹽乾凡四十團共千

枚至荆南獻高保勉因作小琅玕檻子立置之名之  
曰海珠聚

繡水團

龍眼金余但知其名繡水團川彈子而已按本草一  
號荔枝奴

玉角香

新羅使者每來多鬻松子有數等玉角香重堂棗御  
家長龍牙子惟玉角香最奇使者亦自珍之

鐵脚梨

木瓜性益下部若脚膝筋骨有疾者必用焉故方家號為鐵脚梨

黃金額

丘鵬南出甘蔗啖朝友云黃金額

百二子

河東葡萄有極大者惟土人得啖之其至京師者百二子紫粉頭而已

御蟬香

洛南會昌中瓜圃結五六實長幾尺而極大者類蛾  
綠其上皺文酷似蟬形圃中人連蔓移土檻貢上命  
之曰御蟬香挹腰綠

百子瓮

果中子繁者惟夏瓜冬瓜石榴故嗜果者目瓜為百  
子瓮

獨子青



遼東一處有瓜若澆沃則以酒代水實成破為十段  
若段中止有一子而長數寸食一顆可作十日糧國  
人珍之名獨子青

瓜戰

吳越稱雪上瓜錢氏子弟逃暑取一瓜各言子之的  
數言定剖觀負者張宴謂之瓜戰

鼻選

瓜最盛者無踰齊趙車擔列市道路濃香故彼人云

未至舌交先以鼻選

聞香玉女

閩士赴科臨川人赴調會京師旗亭各舉鄉產閩士  
曰我土荔枝真壓枝天子釘坐真人天下安有並駕  
者撫人不識荔枝之未腊者故盛主揚梅閩士不忿  
遂成喧競旁有滑稽子徐為一絕云聞香玉女含香  
雪吳會星郎駕火雲草木無情爭底事清明經對赤  
參軍

澱脚綃

夷門瓜品中澱脚綃夾鶉其色香味可魁本類也

襖寶

崔遠家墅在長安城南就中襖池產巨藕貴重一時  
相傳為襖寶又曰玉臂龍

竹青棗

唐末羣方負固物產不通東漢有商歸自閩越以橄  
欖獻於霸君明日分賜大臣禁帥郝惟慶曰此公狀

類吾鄉竹青棗加之一時久方得薄味官家何用賜  
臣所喜者金稜畧綽盤耳

九天材料

一時之果品類幾何惟假蜂蔗川糖白鹽藥物煎釀  
曝糝各隨所宜郭崇韜家最善乎此知味者稱為九  
天材料

爽團

馮瀛玉爽團法弄色金杏新水浸沒生薑甘草艸丁

香蜀椒縮砂白芷菴鹽花沈檀龍麝皆取末如麪攪  
拌日晒乾候水盡味透更以香藥鋪糝其功成矣宿  
醒未解一枚可以蕭然

百益紅

百益一損者棗一益百損者梨醫氏目棗為百益紅  
梨為百損黃

賜紫櫻桃

溫庭筠曰葡萄是賜紫櫻桃黃葵是鍍金木槿

雲英麪

鄭文寶雲英麪予得食酷嗜之寶贈方藕蓮菱芋雞  
頭芋薺慈姑百合並擇淨肉爛蒸之風前吹眼少時  
石臼中搗極細入川糖蜜熟再搗令相得取出作一  
團停冷性硬淨刀隨意切食糖多為佳蜜須合宜過  
則大稀

蔬

崑味

落藕本名茄子隋煬帝緣飾為昆侖紫瓜人間但名  
崑味而已

千金菜

高國使者來漢隋人求得菜種酬之甚厚故因名千  
金菜今蒿苳也

翰林羹

右補闕崔從授余翰林羹法每用時菜五七種擇去  
老壽者細長破之入湯審硬軟作汁量淺深慎啟閉

時檢察待其玉潔而芳香則熟矣若欲食先煉雍州酥次下乾薑及鹽花冬春用熟筍夏秋用生藕亦刀破令形與薑同既熟攪於羹中極清美盧質在翰林躬為之

胡麻自然汁

羹薑寸截連汁置潔器中煉胡麻自然汁投之更入白鹽搗薑攪勻潑淡湯餅此乃餘杭壽禪師法非事佛者加煉熟蔥韭益佳



百歲羹

俗號羹為百歲羹言至貧亦可具雖百歲可長享也

子母蔗

湖南馬氏有雞狗坊卒長能種子母蔗

龍鬚菜

甕菜出閩中凡百毒悉能解之引蔓而生土人號龍

鬚菜

一束金

杜順食不可無韭人惡其噉候其僕市還潛取棄之  
怒罵曰奴狗奴狗安得去此一束金也

盤盃葱

盤盃葱趙魏間有之幾如拄杖麓但盈尺耳

和事草

葱和美眾味若藥劑必用甘草也所以文言曰和事  
草

五鼎芝

北方桑上生白耳名桑鵝貴有力者咸嗜之呼五鼎  
芝

南方韭

南方韭多鬚葉短濶而圓

玉乳蘿蔔

王昶善營度子弟不許仕宦每年止種火田玉乳蘿  
蔔壺城馬面松可致千緡

蒺藜精

江南吳協劉賓王同省殊不相下時方嚴列廳後石  
芥蘗長協曰可謂介然特立賓王曰誠如公言但恨  
黃髮之言變成疾藜精耳協已耳順聞而啗之

鼃還丹

孟貫獻詩於世宗遂聯九品有藥性論序曰紅莧為  
跛鼃之還丹

題頭菌

保大中村民於爛木上得菌幾一檐狀如蓮花葉而

色赤黃因呼題頭菌

筍奴菌妾

江右多松菜醬筍者惡之罵曰心子菜蓋筍奴菌妾也

金毛菜

石髮吳越亦有之然以新羅者為上彼國呼為金毛菜

笑矣乎

茵葦有一種食之令人得乾笑疾土人戲呼為笑矣  
乎

休休散

湖湘習為毒藥以中人其法取大蛇斃之厚用茅草  
蓋罨幾旬則生茵葦發根自蛇骨出候肥盛采之令  
乾搗末糝酒食茶湯中遇者無不赴泉壤世人號為  
休休散

麝香草

蒜五代宮中呼麝香草

三無比

鍾謨嗜菠薐菜文其名曰雨花菜又以萋蒿菜服菠  
薐為三無比

鍊鶴一羹醉猫三餅

居士李巍求道雪竇山中畦蔬自供有問巍曰日進

何味答曰以鍊鶴一羹

蓋為鍊得身形似鶴形也

醉猫三餅

巍以蒔蘿

薄荷搗飯為餅

問者語所親者以清饑道者旦暮必以菜解

纏齒羊

袁居道不求聞達馬希範間延入府希範病酒厭膏  
膩居道曰大王今日使得貧家纏齒羊詢其故則蔬  
茹

淨街槌

瓠少味無韻葷素俱不相宜俗呼淨街槌

藥

迎年佩



咸通後士風尚於正旦未明佩紫赤囊中盛人參木  
香如豆樣時時傾出嚼吞之至日出乃止號迎年佩

獅子木

潛山產善木以其盤結醜恠有獸之形因號為獅子  
木

三青蔓

按清冷真君外訣貝杞為三青蔓其苗為換骨菜

鍊骨湯

潛山老黃冠年一百一歲扈長官好修攝賂黃冠僕  
竊藥而來乃吳茱萸艾葉川椒杜仲乾木瓜鱉肉  
瓦上松花扈信之名曰鍊骨湯此僊家謂之炙香  
錦郎

檳榔含章甚美絕象枸錦性體堅剛耐於斷削余治  
為書軸因名錦郎

謬劑而已

醫之於人功次天地其間濫謬盜名取資無功有害

藥乎藥乎謬劑而已

一藥譜

必芻清本良於醫藥數百品各以角貼所題名字詭  
異余大駭究其源底答言天成中進士侯寧極戲造  
藥譜一卷盡出新意改立別名因時多艱不傳於世  
余以禮求假錄一通用娛閒暇

假君子

牽牛

昌明童子

川烏頭

淡伯

厚朴

木叔

胡椒

雪蒼同氣

白扁豆

金丸使者

椒

鹹毒僊

預知子

貴老

陳皮

遠秀卿

沈香

化米先生

神麴

九日三官

吳茱萸

酸叟

硫黃

三閭小玉

白芷

中黃節士

麻黃

時美中

薛蘿

導河掾

木猪苓

嗽神

五味子

方麴氏

防風

削堅中尉

三稜中一作都

白天壽

吳木天一作大

洞庭奴隸

枳殼

黃英石

檀香

綠劍真人

菖蒲

魏去疾

阿魏

禹孫

澤瀉

橐籥尊師

僊靈脾

風稜御史

史君子

雪如來

白芨

風味團頭

縮砂

赦肺侯

款冬花

骨鯁元君

華蘼蘼

苦督郵

黃芩

調睡參軍

酸棗仁

黑司命

茯苓

知微老

白薇

太清尊者

朴硝

既濟公

升麻

冷翠金剛

石楠葉

脫核嬰兒

桃仁

澀翁

詞梨勒

抱雪居士

香附子

隨湯給事中

甘遂

斜枝大夫

草龍胆

野丈

白頭翁

建陽八座

蛇床子

玄房仲長統

皂莢

叢生藥王

覆盆子

仁棗

川練子

石仲寧

滑石

命門錄事

安息香

隱上座

郁李仁

水狀元

紫蘓

飛風道者

牙硝

帝膏

蘓合香

畢和尚

畢澄茄

金山力士

自然銅

麝男

甘松

冰喉尉

薄荷

草東牀

大腹皮

腎曹都尉

葫蘆巴

壽祖

威靈仙

玲瓏霍去病

霍香

千眼油

蕤人

延年卷雪

桑白皮

水銀脂

輕粉

黃香影子

拖子

六亭劑

五味子

顯明犯

阿膠

出樣珊瑚木通

中央粉黃蒲

瘡帚何首烏

支解黃丁香

洗瘡丹柳櫛

海脂麒麟竭

水磨橄欖金鈴子

無名印地榆

無憂扇枇杷葉

鬼木串槐角

黑煞星夜明砂

續命筒乾漆

蠻龍舌血沒藥

羽化魁五加皮

清涼種香薷

度厄錢連翹



湯主

山茱萸

聖龍鬆

瞿麥

翻胃木

常山

醒心杖

遠志

玉皇爪

馬鈴兜

偷蜜珊瑚

甘草

德兒

杏仁

混沌螟蛉

寄生

永嘉聖脯

乾薑

紅心石

赤石脂

藥本

五靈脂

靜風尾

荊芥

正坐丹砂

附子

迎陽子

兔絲子

山屠

黃蘗

脾家瑞氣

肉苁蓉

甜面淳于

蜜陀僧

剔骨香

青皮

痰宮劈歷

半夏

玉虛飯

龍腦

鎖着根

苦參

黑龍衣

鯊甲

小帝青

青藍

百辣雲

生薑

綬帶米

麥蘗

半夏精

天南星

夜金

雄黃

沙田髓

黃精

無聲虎

大黃

小昌明

草烏頭

艸兵

巴豆

巢烟九肋

烏梅

百子堂

子草果

皺面還丹

人參

琥珀孫

脂松

賊參

薺

不死麵

苓花

火泉

瀝竹

比目沈香

藥烏

陸續丸

子蔓荊

地白

根瓜萋

天豆

紙破故

滴膽芝

連黃

新羅白肉

子白附

瘦香嬌

香丁

破關符

木蓬莪

王絲皮

王杜仲一作孫友

血櫃

皮牡丹

川元蠹

川芎一作元

九女春

鹿茸

百藥綿

黃耆

英華庫

益智

通天拄杖

牛膝

赤天佩

姜黃

丹田霖雨

巴戟

百丈鬚

石斛

飛天益

旋復花

安神隊杖

麥冬門

鄆芝

天麻

錦綉根

芍藥

草魚目

慈苢仁

茅君寶篋

蒼朮

尉陀生

桂生一作圭

鍊形松子

柏子仁

蘆頭豹子

胡柴

丑寶

牛黃

肚裏屏風

艾

九畹菜

澤蘭

女二天

歸當

大通綠

木香

旱水晶

砂礪

還元大品

地黃

兩平章

活羌

死冰

白蠟

一寸樓臺

窠蜂

三尺錄

杞枸

無情手

砂礪

拔萃團

麝香

綠鬚姜

細辛

笑靨金

菊花

走根梅

葛乾

八月珠

香苗

銀條德星

山藥

埋光烏藥

良薑

堪聖

華撥

破軍殺

大戟

吉祥杵

桔梗

金母蛻

金鬚

線子檀

芽香

良醫匕首

亭歷

產家大器

秦元

滴金卵

延胡索

鬼丹

盧會鬼一作兒

宜州様子

白芷菴

瓦墮班

貝母

孝梗

知母

萬金茸

紫苑

秦尖

蒺藜

西天蔓

前胡

蕨臣

卷柏

五福藥

白欬

保生漿

葉本

狨奴

狗脊

蒜腦諸

百合

備身弩

元花

玉靈片

石膏

黃庭泉

長生之藥惟積久灌溉丹田為上  
僊家以津液為種

壽泉祖黃庭也

草師婆

福德綿吉祥草師婆皆謂艾也

大靈豆

華山陳搏有大靈豆服一粒四十九日不饑筋骨如  
故顏色反嬰

肝天

藥有五天決明為肝天紫苑為肺天神麴為脾天遠  
志為心天茯苓為腎天



草裏丹砂

耆老婦人好熨烙以瓦片煖肚名為草裏丹砂凡陰寒覺足疼用之

扁鵲銘

椒又名扁鵲銘蜀產者上葉屬木故青皮本火故赤  
花應土故黃膜兆金故白子符水故黑五行全足草  
中大丹服餌家重之

却老霜

却老霜九鍊松脂為之辟穀長生

日面天腸福衢壽車

大清艸木方云服雲母者成日面天腸餌鍾乳者登

福衢壽車

草創刀圭

高麗博學記云酥名大刀圭醍醐名小刀圭酪名水

刀圭乳腐名草創刀圭

火輪三昧

凡病膏肓之際藥效難比鍼灸之所以用也鍼長於宣壅滯灸長於氣血古人謂之延年火又曰火輪三昧今人有病必灸亦大癖也

### 火靈庫

昌黎公愈晚年頗親脂粉故事服食用硫黃末攪粥飯啖雞男不使交十日烹庖名火靈庫公間日進一隻焉始亦見功終致絕命

### 大道丸

食草木方黑豆一升去皮貫衆一兩甘草如之茯苓  
吳朮縮砂仁減半剉了用水五升同豆燉煮火須文  
武緊慢得中直至水盡揀去藥取豆搗如泥作雞頭  
實大有蓋甕瓶密封黃巢亂江淮人竄入山林多餓  
死八公山有剎帝利種文禪製此藥名大道丸嚼一  
丸則恣食苗葉可為終日飽雖異草殊木素所不識  
亦無毒甘甜與進飯糧一同獲濟者衆

回頭青

香附子湖湘人謂之回頭青言就地剗去轉首已青  
用之之法砂盆中熟擦去毛作細末水攪浸澄一日  
夜去水膏熬稠捏餅微火焙乾復浸如此五七遍入  
藥宛然有沈水香味單服尤清

禽

姜本

郝輪陳別墅畜雞數百外甥丁權伯勸諭輪畜一雞  
日殺小蟲無數況損命莫知紀極豈不寒心輪曰汝

要我破除羹本雖親而實疏也

挿羽佳人

豪少年尚畜鴿號半天嬌人以其盡惑過於嬌女艷  
妖呼為挿羽佳人

白鷗脯

陳喬張佖之子秋晚並游玄武湖時羣鷗游泛佖子  
曰一軸內本瀟湘喬子俄顧卒吏云此白色水禽可  
作脯否僉議云張佖子半莖鳳毛陳喬男一堆牛屎

喬子從是得陳一堆白鷗脯之名

家常脍脯臍

脍脯臍不可常得野雀久食積功固亦峻緊盖家常脍脯臍也

婆婆兒

鄭遨隱居有高士問何以閔日對曰不注目於婆婆兒即側耳於鼓吹長謂玩鷗而聽蛙也

黑鳳凰

禮部郎康凝畏妻甚有聲妻嘗病求烏鴉為藥而積雪未消難以網捕妻大怒欲加捶楚凝畏懼涉泥出郊用粒食引致之僅獲一枚同省劉尚賢戲之曰聖人以鳳凰來儀為瑞君獲此免禍可謂黑鳳凰矣

兀地奴

世謂鶩為兀地奴謂其行步蹇跚耳

減脚鶩

御史符昭遠曰鴨頗類乎鵝但足短耳宜謂之減脚



鷺

軒郎

韓中書俾舒雅作鶴賦有曰眷彼軒郎治茲松府

書空匠

書空匠者乾祐中冷金亭賞菊分賦秋雁族子秘書

丞敬先就詩曰天掃閒雲秋淨時書空匠者最相宜

云云

福德長

韓軫家藏三義雁圖有贊云伺察非常為福德長

灌陽公

宣城開元寺殿上有鶴云巢沙門梵報撰灌陽公開

府記

瓦亭僊

鶴多在殿閣鴟尾及人家屋獸結窠故或有呼瓦亭

僊者

青喜

李正已被囚執夢云青雀噪即報喜也是旦果有羣  
雀啁啾色皆青蒼至今李族居淄青者呼雀為青喜  
鳳隱

韋嗣立宅後林麓邃密有黃鵠一隻潛於左側每韋  
氏有吉慶事則先期盤翔時人議曰人君德感鳳凰  
呈瑞世未嘗無鳳凰非可出之時而自隱耳今山鵠  
為韋氏家候祥報吉否則與鳳凰隱同焉者也

半瑞

吳興羅捕者得一鳶紫翠色俊鷺可喜山民朱神佐以謂錢俶初即位此是珍祥獻之必推賞典即重價償羅者携諸杭將獻鳶無故而殞滑稽者多以半瑞之言嘲神佐

肉寄生

章貢小蒙川蘓氏山林多鳩賓客滿坐可悉饜飮一網數十百咄嗟可具故其黨戲之曰此君家肉寄生也

九苞奴

動植廣疏云錦雉一名九苞奴謂其有文無德真鳳凰之奴隸

啞瑞

于頔董天休俱為鄜州從事頔文辨天休木訥而衣冠甚麗一日有吏人獲錦雉來獻頔笑曰此物毛羽燦錯但鳴不中律呂亦啞瑞而已矣天休覺其謔已徐曰若以聲語求之蟬似可取其如聞禪師座上敲

拄杖示衆而望道遠矣頓啣之因茲日益參商訟於  
有司至於相罵辱譏調之詩悉著在史牘若發誦之  
可清歡竟日目為鳳凰案

長生網

鷄之為性聞同類之聲則至熟其性必求鷄之善鳴  
者誘致則無不獲自號引鷄為長生網

族味

鷄捕之者多論網而獲故鷄雄羣子同被鼎俎世人

文其名為族味

碧海舍人

隋宦者劉繼詮得芙蓉鷗二十四隻以獻毛色如芙蓉帝甚喜置北海中曰鷗字三品鳥宜封碧海舍人

碧一作北

人日鳥

南唐王建封不識文義族子有動植疏俾吏錄之其載鴿事以傳寫訛謬分一字為三變而為人日鳥矣

建封信之每人日開筵必首進此味

痴伯子

葛從周養一皂鷹甚鷙忽突籠飛去從周惜責掌事  
討捕良急從周方食小僕報桐樹上鷹見棲泊望之  
乃一鵠也怒罵曰不解事奴此痴伯子得萬箇何所  
用促尋黑漫天黑漫天所失鷹名也

唾十三

厭勝章言梟乃天毒所產見聞者必懼殃禍急向梟



連唾十三口然後靜坐存北斗一時許可穰偽漢蒙

州刺史龍驍武人極諱己名又父名碯

一作碯

子名

蛩亦諱之郡人呼梟曰唾十三鵲曰喜奈何蛩曰秋  
風部屬私相告云若使君祖諱飯吾輩亦當稱甌家  
粥耶

### 納膾場小尉

取魚用鷓鴣快捷為甚當塗茨塘石阜民莊舍在焉  
畜鷓鴣於家纜小舟在岍日遣一丁取魚供家邑尉

過時見之謂阜民曰小舟即納膾場鷓鴣乃小尉耳  
復曰江湖漁郎用鷓鴣乃小尉耳復曰江湖漁郎用  
鷓鴣者名烏頭網

錦地鷓

閩中造蓋花紋鷓鴣斑點試茶家珍之因展蜀畫鷓  
鴣於書館江南黃是甫見之曰鷓鴣亦數種此錦地  
鷓也

觀自在

耶律德光入京師春日聞杜鵑聲問李崧此是何物  
崧曰杜鵑唐杜甫詩云西川有杜鵑東川無杜鵑涪  
萬無杜鵑雲安有杜鵑京洛亦有之德光曰許大世  
界一个飛禽任他揀選要生處便生不生處種也無  
佛經中所謂觀自在也

淵明鬼

太府少卿潘崇有處女名妙玉詠杜鵑云一九苞奴  
般毛羽淵明鬼

項刺蟲

後周武帝置官于瀘川釀毒藥為酒年以供進所用

材品不一名野

一作夜

又酒役者皆取大辟舍罪而驅

策之官長歲頒續命金以毒氣薰煮官被者多死徒  
卒恐怯鳩為一拂鳥項刺蟲蝨蛇為勞歷蜂為小峭

九羅

一作九閻羅

明崇儼厭勝書鬼車九首妖恠之魁凡所遭觸滅身  
破家故一名九羅其掌之者曰天血使者然物可以

類勝羽毛中凡十種鬼車切畏之宜用烹製召巫為  
祭盡禳禳之法焉

相如錦

相如文君用鸛鸛裘貫酒長沙浪士王渲與名倡董  
和僊客為麗服塗鸛鸛狀號相如錦久而都下亦效  
之

獸

白沙龍

馮翊產羊膏嫩第一言飲食者推馮翊白沙龍為首  
珍郎

天后好食冷修羊腸張昌宗冷修羊手札曰珍郎殺  
身以奉國

角僊

華清宮一鹿十年精俊不衰人呼曰角僊

玉署三牲

道家流書言麋鹿麕是玉署三牲神僊所享故奉道

者不忌

糟糠氏

偽唐陳喬食蒸肫曰此糟糠氏面目殊乖而風味不淺也

金鞍使者

王昶傾金錢市名馬凡得五疋各有位號曰金鞍使者千里將軍致遠侯渥洼郎驥國公

靈壽子

武宗為穎王時邸園畜食獸之可人者以備十玩繪  
十玩圖於今傳播

九皋處士

鶴

玄素先生

白鷗

長鳴都尉

雞

靈壽子

龜

惺惺奴

猴

守門使

犬

長耳公

驢

鼠將

貓

苒客

鹿

辨哥

鸚鵡

麝香駒



魏王繼岌奉命伐蜀王衍苑馬數百皆逸足也繼岌猶比選之得二十許足格賞不可言

麝香駒 錦耳驄 駱十二 趨日驄

偏界王 陷冰駒 長命騮 孫兒驄

籠松白 八百哥 掠地雲 錦地龍

雪面娘 月影三 玉尾駒 撒沙騮

天花駱 旋風白 宰地嬌 六尺金

啣蟬奴 後唐瓊花公主自牝角養二猫雌雄各

一有雪白者曰御花朵而烏者惟白尾而已公主  
呼為麝香騎婢已

尾君子

郭休隱居太山畜一胡孫謹恪不踰規矩呼曰尾君  
子

黃奴

耒陽廖習之家生一黃犬識人喜怒順指習之嘗作  
歌云吾家黃奴類黃耳

綠耳梯

江南後主同氣宜春王從謙常春日與妃侍游宮中  
後圃妃侍覩桃花爛開意欲折而條高小黃門取綵  
梯獻時從謙正乘駿馬擊毬乃引韁至花底痛採芳  
菲顧謂嬪妾曰吾之綠耳梯何如

菊道人

亳社吉祥僧刹有僧誦華嚴大典忽一紫兔自至馴  
伏不去隨僧坐起聽經坐禪惟食菊花飲清泉僧呼

菊道人

白雪姑

余在輦轂至大街見揭小榜曰虞大博宅失去猫兒  
色白小名白雪姑

鈍公子

天成長興中以牛者耕之本殺禁甚嚴有盜屠私販  
不敢顯其名婉稱曰格餌

一作耳

亦猶李甘家號甘子

為金輪藏楊虞卿家號魚為水花羊陸象僊家號象

為鈍公子李栖筠家號犀為獨筭牛石虎時號虎為黃猛朱全忠時號鍾為大聖銅俱以避諱故也

肉胡床

吉祥座杜重威馬也肉胡床景延廣馬也

肉竈燒丹

開運中術士曹盈道來謁自陳能肉竈燒丹借廳修養詢其說肉竈者末生朱砂飼羊羔脂乃供厨借廳者素女容成閉陽採陰之意

四足僂人

魯人東野賓王適吳至盱眙村店使僕夫羅米拾薪俱未來而馬已脫鞍解絡飽於芳秀也賓王羨曰綠耳公爾為四足僂人我是兩腳餓鬼

黃毛菩薩

予陽翟莊舍左右有田老者不為欺心事出言鯁直譚名撞倒牆尤不喜殺牛見村舍懸列牛頭脚告妻子曰天下人所喫皆從此黃毛菩薩身主發生臨了

殺倒却有天在

峻青宅

李道殷華山道士山棲谷飲有奇術能攝伏鬼神畜  
一黑猿兒呼為臂童道殷於菴側古松上以茅艸枝  
稍營一巢為臂童寢息之所名曰峻青宅

蟲

塗金折枝蜻蜓

後唐宮人或網獲蜻蜓愛其翠薄遂以描金筆塗翅

作小折枝花子金線籠貯養之爾後上元賣花者取  
象為之售於游女

花賊

溫庭筠嘗得一句云蜜官金翼使徧示知識無人可  
屬久之自聯其下曰花賊玉腰奴予以謂道盡蜂蝶  
篆愁君

臨川李善寧之子十歲能即席賦詩親友嘗以貧家  
壁試之略不構思吟曰椒氣從何得燈光鑿處分拖



涎來藻飾惟有篆愁君拖涎指蝸牛也

莎亭部落

浮屠氏彌陀經云極樂世界有白鷗孔雀鸚鵡舍利  
迦陵頻伽故今人目為西方部落至於呼蛩為莎亭  
部落不知何為

青林樂

音藥

唐世京城游手夏月採蟬貨之唱曰只賣青林樂婦  
妾小兒爭買以籠懸窓戶間亦有驗其聲長短為勝

負者謂之僂蟲社

爾雅蟲

小符拆字為賦得父緒餘余過其家正見莊賓來呈  
蠱小符曰此蟲雅哉予曰子將拆蠱為二出雅字以  
張本若作爾雅蟲無疑也適中其謀輒笑而已

魚

一命鰻鱻

江南紫微郎熙載酷好鰻鱻庖人私語曰韓中書一

命二鰻鰈

王字鯉

鯉魚多是龍化額上有真書王字者名王字鯉此尤通神

裙襴大夫

晉祠小池蓄老鼃大如食盤不知何人題闌柱曰裙襴大夫烏衣開國何元美後失鼃所在

平福公

唐故宮池中有一六目龜或出曝背人見其甲上有  
刻字微金髣髴如曰平福公君靈古老傳是武宗王  
美人所養福猶腹也借音而已

水晶人

二三友來訪買得蝦蟹具饌語及唐士人逆風至長  
鬚國娶蝦女事坐客謝謙冲曰蝦女豈不好白角衫  
裏箇水晶人滿筵無不大笑

黃大

偽德昌宮使劉承勲嗜蟹但取圓殼而已親友中有  
言古重二螯承勲曰十萬白八敵一箇黃大不得謂  
蟹有八足故云

筴舌蟲

盧絳從弟純以蟹肉為一品膏嘗曰四方之味當許  
含黃伯為第一後因食二螯筴傷其舌血流盈襟絳  
自是戲純蟹為筴舌蟲

軟釘雪籠

京洛白鱠極佳烹治四方罕有得法者周朝寺人楊承祿造脫骨獨為魁冠禁中時亦宣索承祿進之丈其名曰軟釘雪籠

水族加恩簿

吳越功德判官毛勝多雅戲以地產魚蝦海物四方所無因造水族加恩簿品叙精奇有錢氏子得之余觀私家一夕全錄

水族浙地之產為多加恩簿者晉陵毛勝公敵所出

也鬚鱗殼甲種類差殊薦醴登盤皆可於口陳言爛  
說不足盡其妙故各揚乃德各叙所材然後總材德  
形容之美假以封之令者蓋滄海龍君之命夫龍擅  
於海君制萬族號令其間寧有不可勝生居水國饜  
享羣鮮常以天饒居士自名則觀此簿者宜不責而  
笑也

玉桂僊君

江殊乃江  
瑤之文名

令咨爾獨步王江殊  
鼎鼐僊姿瓊瑤紺體  
天賦臣美

時稱絕佳宜以流碧郡為靈淵國追號玉桂僊君稱

海珍元年

流一作深

章丘大都督

一滄浪頭蓋章舉  
三淡然子蓋蚶菜

二白中隱蓋車螯  
四季遐蓋鰕魁

令章丘大都督忠美侯滄浪頭隱浪色奇入甌稱最  
杜口中郎將白中隱負乃厚德韜其雄姿殊形中尉  
兼靈甘尹淡然子體雖詭異用實芳鮮玉德公季遐  
純潔內含爽妙外濟滄浪頭可靈淵國上相無比白  
中隱可含珍大元帥豐甘上柱國兼脆尹淡然子可



天味大將軍遠勝王李遐可清綃內相頡羹郡王

爽國公

一南寵乃蟻 二甲藏用乃蝓蟬  
三解蘊中乃蟹 四解微子乃彭越

令多黃尉權行尺一令南寵截然居海天付巨材宜  
授黃城監遠珍侯復以爾專盤處士甲藏用素稱蟻  
副衆許蟹師宜授爽國公圓珍巨美功臣復以爾甘  
黃州甲杖大使咸宜作解蘊中足材腴妙螯德充盈  
宜授糟丘常侍兼美復以爾解微子形質肖祖風味  
專門咀嚼謾陳當寘下列宜授爾郎黃少相

甘鬆左右丞

仲局乃  
蛤蝶

令合州刺史仲局重負雙宅閉藏不發既命之為舍  
津令陞之為憲誠君矣粉身功大償之實難宜授紫  
暉將軍甘鬆左右丞監試甘圓內吏

清腴館學士

文名靈  
蛻先生

令靈蛻先生外無排脅之敝內無鯁喉之亂宜授紅  
鐫祭酒清腴館學士

橙蠶錄事

蠶名紅文  
生盧清臣

令惟爾清臣銷酲引興鱗鬣之鄉宜授橙蠶錄事守

招賢使者

珍曹必用郎中

鱗名時充

令珍曹必用郎中時充鑑材本美妙位無高宜授諸  
衙効死軍使持節雅州諸軍事

骨鯁卿

鱗名白圭夫子

令惟爾白圭夫子貌則清臞材極美俊宜授骨鯁卿

醉舌公

龜名甘鼎

令甘鼎究詳爾調鼎之材嚙舌潮津宜封醉舌公

掇甲尚書

龜名甲拆翁

令甲拆翁挾彈于中巧也負擔于外禮也介冑自防  
不問寒暑智也步武懦緩不踰規繩仁也故前以掇  
甲尚書榮其迹顯其能宜授金丸丞相九肋君

典醫大夫

蠡名長尾先生

令長尾先生惟吳越人以謂用先生治醫華夏無敵  
宜授典醫大夫僊衣使者

新美舍人

石首名  
元鎮

令元鎮區區枕石子孫德甚富焉宜授新美舍人

懷竒令史

石決明名  
朱子房

令和羹長朱子房酒方沈酣臭薰一座挑筋少進神

明頓還至於七孔賦形治目為最宜授懷竒令史

甘盤校尉

烏賊名  
甘盤

令甘盤校尉吐墨自衛白事有聲宜授喫墨將軍

通幽博士

龜名元  
介卿

令元介卿爾卜灼之効吉凶了然所主大矣宜授通  
幽博士

同體合用功臣

借眼公  
乃水母

令惟爾借眼公受體不全兩相藉賴宜授同體合用  
功臣左右衛駕海將軍

點花使者

李藏珍即真珠  
斑希即玳瑁

令李藏珍照乘走盤厥價不貲斑希裁簪製器不在  
金銀珠玉之下藏珍宜授圓輝隱士斑希宜授點花

使者

梵響參軍

壯蟪曰房叔化梵響曰屈突通研光螺曰阮用光珂曰羅幼文

令房叔化粉廁湯丸裏護丹器屈突通振聲遠聞可  
知佛樂阮用光運體施功物皆滑瑩羅幼文類乎貝  
孫點綴鞍勒燦然可觀小有文采叔化可豪山太守  
樂藏監固濟突通可曲沃郎梵響參軍攝玉塔金舍  
用光可檢校大輝光宜充掌書記幼文可馬衣丞

濟饒都護

田青是螺蛳申潔是蛙江伯夷是鱖魚屯江小尉是江狔

令惟爾田青微藏淺味無所取材世或烹調以為恠  
品申潔蒼皮癰疹矮股跳梁江伯夷宋帝酷好鰾則  
別名屯江小尉漁工得雋亦號甘肥田青授具體郎  
申潔宜授濟饒都護行水樂令伯夷宜授宋珍都尉  
南海詹事屯江小尉宜授追風使試湯波太守

銀絲省饜德郎

錦袍氏鰕也李本鯉也鮮于羹鮓也楚  
鮮白魚也縮項仙人鰻也食寵侯鰾鯉

也車長福鰾也管統蔥管也備  
員居士東崇也唐少連崇連也

令以爾錦袍氏骨疎肉緊體具文章宜授蘓腸御史



僊盤游奕使以爾李本三十六鱗大烹允尚宜授跨  
僊君子世美公以爾鮮于羹斫膾清妙見稱杜陵宜  
授輕薄使銀絲省饜德郎以爾楚鮮隱釜沈糟價傾  
淮甸宜授傾淮別駕以爾縮項仙人鬼腹星鱗道亨  
襄漢宜授槎頭刺史以爾食寵侯友節斑駁標致高  
爽宜授添厨太監以爾單長福曲直靡常鮮載具美  
宜授泥蟠掾以爾管統省象菜伯可備煎和宜授長  
白侯同盤司箸局平章事以爾備員居士腥羶無狀

見取俗人宜授鍊身公子以爾唐少連池塘下格代  
匱充庖宜授保福軍節度使

春榮小供奉

河狔名  
黃薦可

令黃薦可爾澤嫩可貴然失於經治敗傷厥毒故世  
以醇疵隱士為爾之目特授三德尉兼春榮小供奉

輔庖生

顧名新  
餐氏

令新餐氏爾療饑無術清醉有材莽新妖亂臨盤肆  
餐物以人汙百代寧洗爾之得氏累有由矣宜特補

輔庖生

表堅郎

今蓋頑生乎泥沙薄有可採宜授表堅郎



清異錄卷上